



QUÆSTIO MEDICA,
QUODLIBETARIIS DISPUTATIONIBUS
MANE DISCUTIENDA,
IN SCHOLIS MEDICORUM,

Die Jovis tertiâ Decembris 1705.

M. LUDOVICO GUILLOT,
DOCTORE MEDICO,

PRÆSIDE.

An hysterica volatilia?

I.

MORBUS, quem hypochondriorum tensio, murmur in ventre, respiratio inæqualis & impedita, suffocatio in gutture, oculorum inversio, *aporia*, *anxia*, & motus convulsi in facie & artubus excitati comitantur, hysterica dicitur. Periculosus quandoque est ille affectus, & nisi ejus vires retundantur, afflictas mulieres enecat. Circa originem hujus morbi alii aliter sentiunt. Neoterici quidam contendunt in affectu hysterico sanguinem tenuiorem & flatulentum, ubi motu majore in vasa pulmonum & cordis confertim influit, in iisdem non sine impetu ebullire, & ita pulmonum & cordis substantiam infercire & aggravare, ut solitis moribus obeundis minimè sufficiant, sanguisque in ejusmodi vasis moras necere cogatur, & vix ex iisdem possit erumpere. Hinc oppressio, respiratio difficilis & sæpenumero nulla cum spirituum deliquio; hinc totius microcosmi prava diatheses oriuntur. Alii vero causam passionis hystericae tribuunt vaporibus, ex utero per venas, arterias, & cæca, nescio quæ, spiracula exeuntibus, quorum operâ, facultates læduntur, functiones intercipiuntur, quasi uno ex utero tanquam ex Pandoræ pyxide, tot symptomatum infortunia prodirent, & ipse uterus omnium ferme morborum muliebrium esset parens, malorumque omnium sexui sequiori minitantium, ilias; scilicet juxta illos, idem, qui ova progengerat, uterus, qui eadem sæta fovet, qui

ex ovis puero prodeunti, quo vitam sustentet alimentum, quo temperetur aërem, supeditat, is ipse nihil non molitur, ut parentes pessumdet.

I I.

VERUM quam procul à scopo aberrant, indè liquet, quod sanguis tenuior per vasorum tubulos facilè dilaberetur, & si id minus contingeret, saltem notam sibi, tritamque viam eo facilis sequeretur, quo tenuior, magisque esset agitato. Neque verosimilius loquuntur, qui hystericæ affectionis causam, in vapores sublato & uterum è loco moventes, instar globuli cujusdam refundunt. Qui enim fieri potest ut uterus, in angustis hypogastricis, intestinum inter rectum & vesicam urinariam interclusus, & quatuor ligamenti omni ope ossibus pubis & ilei alligatus, possit sursum aut deorsum ferri? Inde tutior videtur assertio, sanguinem viscidiorum & crassiorem hujusmodi symptomatum causam esse: Siquidem palpitatio cordis, & syncope, quæ in his morbis superveniunt, ab ejusmodi sanguine oriuntur. Ubi enim sanguis majorem visciditatem atque consistentiam sibi comparavit, si nimia corporis agitatione ad cor confluit, omnes ipsius meatus occupat, & fibræ adeo graviter insidet, ut licet vehementer contrahantur fibræ, viscidum illum sanguinem unâ systole non procul è corde expellant, nec in pulmonum tubulos totum protrudant; & sic necesse est, ut sanguis circa cordis ventriculos hæreat; Unde continuò irritatæ fibræ vehementiores ac celeriores contractiones edunt, ut quod ipsis molestum est, altius propellant, & exturbent. Simili ratione in syncope, omnes simul collabuntur vires, ægræ concidunt sine sensu, sine motu, arteriarum exigui, & imbecilli pulsus existunt, spiritus fere intercluditur, quod crasso sanguine, cor & arteriæ ita obruuntur, ut ipsius circuitum minimè promoveri valeant. Imo ab eodem sanguine spiritus nervos permeantes sufflamini, teneriores membranas commovent, vellicant, succeduntque tensio, oculorum gyratio & similia symptomatum genera. Neque semel observatum est passiones hystericas à subito terrore, ingenti tristitiâ, aliisque animi pathematibus, in quibus à circuitu sanguinis interturbato, cerebri incolæ spiritus affecti fuerant, exortum ducere; humores quippe vitiosi, intra caput uberius congeruntur, & in extinctarum cadaveribus, nervorum principia sero acri madida, ac prorsus immerfa deprehenduntur, ex quibus passiones hystericas nasci judicandum est; quod spiritus nervorum principia occupantes, viscidum sanguinis copiâ obruantur, & in confusionem agantur ab heterogeneis humoribus, quos secum per nervorum systema longè deducunt, adeoque motus cient spasmodicos.

I I I.

QUA arte irritati à sanguine spiritus, explosivos motus excitare valeant, cuius abunde patebit, qui penitius fuerit perscrutatus symptomata hystericos affectus concomitantia, qualia sunt vomitus,

borborygmi, strangulatio, debere suam originem materiis viscidis, acribus in ventriculo delitescentibus, quæ sanguini commixtæ suam ipsi labem impertiunt, & spiritus ad explosionem praternaturalem faciendam aptos efficiunt. Unde enim in vomitu, motus ventriculi convulsivus, quo simul fibris vehementer contractis, contenta omnia foras ejiciuntur, nisi à majori copiâ, salinarum chilosæ materiæ partium; quippe quæ cum acidiores sint, fibras ventriculi nerveas irritant, quarum irritatione, spiritus ad cerebrum reflui, suo cum phrenicis nervis aliisque ad musculos abdominis pertingentibus commercio, musculorum contractiones augent, vomituique fores pandunt. Nonne etiam borborygmi motum arguunt materiæ intra intestinorum cavitatem contentæ, quam parit viciata alimentorum fermentatio, in quantum aër intra alimentorum substantiam contentus, debitæ fermentationis in intestinis & ventriculo defectu, dissolvitur, molemque suam expandit. Quæris cur laryngis musculi, ita sese contrahant in hystericis affectibus, ut mulieres suffocari videantur. Quasi eadem particulæ salinæ & austæræ è ventriculo per œsophagum excurrentes, membranam musculos cooperientem non concuterent & contraherent. Quid mirum quod spiritus animales, quorum partes sunt subtilissimæ, cum noxas qualvis aliunde sibi allatas facilius admittunt, & in amplexus suos suscipiunt, ejusmodi imprægnati acribus materiis, sese expandere nitantur, inque suis expansionibus faciendis, convulsivos motus pariant? An autem ad causam morbi attendendam & eliminandam, volatilibus remedium præsentius?

I V.

PASSIONUM hystericarum causas & symptomata recensita habes. Earum radices evellere iam meditaris. Ne illas sinas serpere, quas sola vis valet frangere. Quod in acutis Venerandus senex observari voluit, dum initio movendum, si quid movendum sit, jubet & clamat, de hystericis dictum fuisse dixeris, qui & incipientem paroxysmum, & iniquius agentem in decursu morbi observare non es dedignatus; à majori quiete partium, quibus constat sanguinea moles, majorem visciditatem & consistentiam fuit adeptus sanguis, ab illo sanguine uti prius dictum, involuti spiritus sese extricare conantur, in *ἀνωμαλίας* adiguntur, & convulsiones faciunt, iis insiste, quæ molem infringant, motum augeant, & sanguini suam restituant fluiditatem. Quid aptius volatilibus, quæ fermentationem accelerant, faciliiori negotio principia omnia sanguinis penetrant; ea à se invicem separant: Ad illa tanquam ad sacram anchoram confuge, illorum ope omnem paginam adimplebis, celerius movebitur sanguis, liberius permeabit thalamos & anfractus cordis, pulmonumque tubulos, hæreere atque cumulari desinet, augebuntur spiritus, faciliior eorum erit influxus, solidarumque partium elater longe firmior evadet. Volatilibus si parcas, do-

lores in abdomine & lumbis atrociore, paroxysmi convulsivi graviores, difficilior respiratio, & oppressio erunt. Cætera omnia recrudescunt. Pax ubique reddetur, pulso foras volatilibus hoste.

V.

DUM crassiorem attenuare sanguinem volatilibus paras, cave prudens sis in exhibendo, cave tempus & occasionem captes. Sedulo explora ventriculi & intestinorum sortem. Si humoris viscosi & acrioris saburrâ ventriculi tunica inferciatur, tum primas expurgari vias decet. aut leniori catharsi, aut ipso emetico, si nauseabunda sit ægra, viresque suppetant. Dum prudentem te volo, à venæ sectione nimium abhorrentem te nolim. Illa te tutum, te cautum, te sapientem faciet. Huic, si plenæ venæ tument, huic, si suppressus catameniorum sanguis, mali labem arguat, huic, ubi rutilans facies, flammea oculorum acies, arida linguæ superficies, parta victoria debetur; facilius partes heterogeneæ secedent, felicius succedent volatilia, quæ tamen ne indiscriminatim præscribenda existimes. Suavia volatilia Moschus, Rosæ, &c. Acido quo præpollent, spiritus à suis muneribus avertunt, & ipsos ad explosionem paratiores, in motus inordinatos provocant, atque velut admotæ scintillæ accendunt. Graveolentia vero ut Galbanum, assa fetida, castoreum, plumæ perdicum, vetera coria combusta, spiritus volatiles C. C. salis ammoniaci, sale suo acri volatili alkalino, palantes spiritus reducant, in ordines cogunt, ex iis viscida excutiunt & profligant.

Ergò hystericis volatilia.

Domini Doctores disputaturi:

M. Joannes Gelly.
M. Michaël Sauval.

M. Alexander-Petrus Mattot.
M. Claudius Bourdelin, Serenissima Ducissæ Burgundia Medicus perpetuo ordinarius, & Regia Scientiarum Academia socius.

M. Abrahamus Theuart.
M. Claudius Quartier.

M. Claudius Buvlet, à Regiâ Scientiarum Academia.

M. Joannes-Francisus Foy-Vaillant, à Regiâ Numismatum Academia.

M. Petrus Perreau.

Proponebat Parisiis JOANNES-BAPTISTA MONGIN
Regulensis, Baccalaureus Medicus. A. R. S. H. 1705.

Apud Viduam Francisci Muguet, Regis & Facultatis Medicinæ Typog.